

## Take Christ out of Christmas and you are left with M and S

Rhys Powys

“Christmas wouldn’t be Christmas without Morrisons”

Medde’r dyn ar y sgrin  
Tra bod llun o Colleen  
A’i ffrindiau yn dawnsio,  
Mewn ffrogiau o Tesco,  
Nid i stabal yr ych  
Ond i ryw blasty gwych  
I fwynhau “Gwledd y Nadolig”.

Does dim gwahoddiad i’r doethion,  
Dim ond i Stacey Solomon,  
A’i holl gyfoedion.  
Llund gwlad o ddanteithion,  
A hynny, gyfeillion,  
Mewn “High Definition”.

Bwrdd ar ôl bwrdd  
O seigiau bach blasus  
Ac unffurf a thaclus  
A hynod o grand -  
“And that’s why Mums go to Iceland.”

Mae ’na liaws o angylion  
Yn y Carphone Warehouse  
Yn lawr-lwytho “apps”  
Ac yn sylu ar ‘faps’  
I gael Googlo’r bugeiliaid  
Allan yn y maes.  
Ac yna ‘trydar’ i holl blant y llawr  
Eu newyddion da o lawenydd mawr.

iPhone, iPad, iPod -  
Ai fi yw'r unig un sy'n ei gweld hi'n od  
Rhoi anrhegion mor dechnolegol  
I gofio Mab y geni gwyrthiol?

Mae'n ddeg y nos, a dyma Huw  
Yn darllen y 'news' ar ei 'auto-queue'  
Fod 'na danau'n llosgi ar hyd strydoedd Llundain,  
Protestio yn Cairo, yn Athen a Rhufain.  
Gohebiaeth gwrthdaro o bedwar ban byd,  
A rhaid ein hatgoffa, o hyd ac o hyd  
Am y bechgyn dewr, dan haul y paith,  
Ar ddydd Gwyl y Geni, yn gwneud eu gwaith  
O'n gwarchod rhag terfysg y Taliban -  
"A dyma'r diweddara o Affganistan ..."

Yna'n sydyn, mae plentyn yn chwerthin  
Wrth weld pluen eira yn disgyn,  
Ac ar y radio yn y gegin  
Dwi'n clywed llais Delwyn  
Yn canu am seren,  
"Fry uwch Bethlehem"  
Ac mae'r ty yn tawelu -  
Mae'r plant yn y gwely.  
A dwi'n diffodd y "telly" -

"Christmas wouldn't be Christmas without Christ ..."

Clic! Ac mae heddwch yn teyrnasu.